

2021-imut aningaasanut inatsisissatut siunnersuut

pillugu

Aningaasaqarnermut Akileraartarnermullu Ataatsimiititaliap

inatsisissatut siunnersuutip aappassaaneerpeqarneranut

ISUMALIUTISSIISSUTAA

Aningaasaqarnermut Akileraartarnermullu Ataatsimiititaliap suliarinninnermini kingullermik ilaasortarai:

Inatsisartunut ilaasortaq Hermann Berthelsen, Siumut, siulittaasoq
Inatsisartunut ilaasortaq Múte Bourup Egede, Inuit Ataqtigiit, siulittaasup tullia
Inatsisartunut ilaasortaq Malene V. Rasmussen, Demokraatit
Inatsisartunut ilaasortaq Mala Høy Kúko, Siumut
Inatsisartunut ilaasortaq Peter Olsen, Inuit Ataqtigiit
Inatsisartunut ilaasortaq Aleqa Hammond, Nunatta Qitornai
Inatsisartunut ilaasortaq Jens Napaattooq, Partii Naleraq

Ulloq 30. september 2020-imi siullermeerinninnerup kingorna ataatsimiititaliap siunnersuut misissorpaa.

Imarisai:

1. Aallaqqaasiut3	
1.1 Aningaasanut inatsisissatut siunnersuutip ilusiligaanera aningaasaliisarnermilu maleruagassat	3
1.2 Ataatsimoortumik tulleriiarisarnissamik tunngavik	4
1.3 Aningaasanut inatsisissatut siunnersuummik siullermeerinninneq	5
1.4 Aningaasaqarnermut Ataatsimiititaliap aallarniutitut oqaaseqaatai	7
2. Naalakkersuisut allannguutissatut siunnersuutaat	14
2.1 Aningaasaqarnermut Ataatsimiititaliap ataatsimut isigalugu isummernera	15
3. Aningaasaqarnermut Ataatsimiititaliap apeqqutai/oqaaseqaatai aalajangersimasut suliaasaqarfinnut agguataarlugit	– 16
4. Aningaasaliissutinut allannguutissatut siunnersuutit	16
4.1. Sammisaaq 1 – Teknikikkut allannguutit	17
4.2. Sammisaaq 2 – Missingersuutinut sunniuteqanngitsumik allannguutit	17
4.3. Sammisaaq 3 – Oqartussaaffimmik allannguneq	18
4.4. Sammisaaq 4 – Aningaasartuutaanerusut	18
4.5. Sammisaaq 5 – Aningaasartuutaannginnerusut	19
4.6. Sammisaaq 6 – Isertitassatut missingikkat nutaat aammalu aningaasartuutinut inatsisitigut pisussaaffigisanut missingikkat nutaat	19
4.7. Sammisaaq 7 – Suleriaatsimut Ataatsimiititaliap	20
5. Oqaasertaliussanut allannguutissatut siunnersuutit	20
5.1 Naalakkersuisut oqaasertaliussanut allannguutissatut siunnersuutaat	20
6. Aningaasaqarnermut Ataatsimiititaliap inassuteqaatai	22

Ilanngussanut takussutissiaq:

- A. Ataatsimiititaliap Naalakkersuisunut apeqqutai 31. august 2020-meersut.
- B. Ataatsimiititaliap ilanngussaq A malillugu apeqqutaanut Naalakkersuisut akissutaat 2. september 2020-meersut.
- C. Ataatsimiititaliap Naalakkersuisunut apeqqutai 15. september 2020-meersut.
- D. Ataatsimiititaliap ilanngussaq C malillugu apeqqutaanut Naalakkersuisut akuissutaat.
- E. Ataatsimiititaliap Naalakkersuisunut apeqqutai 3. november 2020-meersut.
- F. Aningaasaqarnermut Naalakkersuisumik siunnersuunermut aggeqqusissut.
- G. Naalakkersuisut akissuteqaataat.
- H. Naalakkersuisut tusagassiorfinnut nalunaarutaat pillugu apeqqutit.
- I. Aningaasaliissutit pillugit Naalakkersuisut allannguutissatut siunnersuutaat 1-54, 28. oktober 2020-meersuq.
- J. Oqaasertaliussat pillugit Naalakkersuisut allannguutissatut siunnersuutaat 55-62, 28. oktober 2020-meersuq.
- K. Ataatsimiititaliap AIS 21 pillugu apeqqutai 10. Novemberimeersut.
- L. Ataatsimiititaliap ilanngussaq K malillugu apeqqutaanut Naalakkersuisut akissutaat 16. Novemberimeersut.

1. Aallaqqaasiut

2021-imi aningaasanut inatsisissatut siunnersuut Inatsisartunit ulloq 30. september 2020-imi siullermeerneqarpoq. Inatsisartut Naalakkersuisullu pillugit inatsimmi § 16, imm. 1 naapertorlugu aningaasanut inatsisissatut siunnersuutip siullermeerneqarnerata aappassaaneerneqarneratalu akornanni Aningaasaqarnermut Akileraartarnermullu Ataatsimiititaliaq aningaasanut inatsisissatut siunnersuut pillugu Inatsisartunut isumaliutissiissuteqassaaq.

Aningaasanut inatsisissatut siunnersuut Uummannami 24.-28. august 2020-imi missingersuutit pillugit isumasioqatigiinnermi ataatsimiititaliamit misissorneqarpoq. Ataatsimiititaliap aningaasanut inatsisissatut siunnersuummik misissuinini suliarinninninilu tunngavigalugit Naalakkersuisunut apeqquteqaatiliornikuuvoq.

Aningaasanut inatsisissatut siunnersuummik Inatsisartut siullermeerinninnerata kingornatigut Naalakkersuisut ulloq 28. oktober 2020-imi allannguutissatut siunnersuutit 62-inik saqqummiussippat. Aningaasaliissutinut taamatullu oqaasertaliussanut allannguutissatut siunnersuuteqartoqarpoq.

Aningaasaqarnermut Naalakkersuisoq ulloq 8. november ataatsimiititaliamit siunersiorneqarpoq. Tamatumani siunertarneqarpoq aningaasanut inatsimmi oqimaaqatigiinnissamik piumasaaqat pillugu apeqqutip illuatungeriit akornanni allaqatigiinnerup inaarneqarnissaa aammalu suliaq pillugu ataatsimiititaliap sulinerata ingerlateqqinnissaa.

Siunnersuutip aappassaaneerneqarnissaata ulloq 20. novemberimut kinguartinneqarnissaa ataatsimiititaliap Siulittaasoqarfimmut qinnutigisariaqarsimavaa, tamatumali nassataraa siunnersuutip pingajussaaneerneqarnissaanut, ulloq 27. novemberimut kinguartinneqartumut, isumaliutissiissusiassami piareersarnissaanut ataatsimiititaliap suli piffissakinnerulenera.

Inatsisartut aningaasanut inatsisissatut siunnersuummik aappassaaneerinninnissaanut ataatsimiititaliaq matumuuna isumaliutissiissuteqarpoq.

1.1 Aningaasanut inatsisissatut siunnersuutip ilusiligaanera aningaasaliisarnermilu male-ruagassat

Aningaasanut inatsisissatut siunnersuutip ilusiligaanera missingersuutit pillugit inatsimmi nutaami kapitali 4-mi pingaarnertigut aalajangersarneqarpoq. Naalakkersuisut aningaasanut inatsisissatut siunnersuutip suliarineqarnissaanut aqqissuunneqarnissaanullu malittarisassaliorsinnaasut § 13, imm. 1-imi allassimavoq. Malitsigisatut nalunaarutinik attuumassutilinnik, inatsisip piviusunngortinneqarnissaanut aqutsivigineqarnissaanullu pingaaruteqartunik, suliaqarnertik Naalakkersuisut aallartissimagaat AIS 2019-imut nalinginnaasumik nassuiaatinik misissuinermini ataatsimiititaliap maluginiarpaq. Suliali tamatuma qaqugu naammassineqartussatut naatsorsuutiginerqarnera ilisimaneqanngilaq. Suliaq tamanna 2020-mi ingerlaqqissasoq Naalakkersuisut paasisutissiippat. Kiisalu malitsit nalunaarutit arlallit suliarineqareernerisigut missingersuusiornermut inatsit aningaasartuutit aqutsinermut naalakkersuinikkut killissanik pisariaqartumik oqimaaqatigiittoqarnissaata qulakkeerneqarnissaanut peqataaqataasussanik tunngavissiissasoq

Naalackersuisut paasissutissiipput. Pisortat aningaasaqarnerannik aqutsinermi tunngavissat inissinnissaannut Inatsisartut sulii ukiuni marlussunni utaqqeqqaartariaqarsorinarput.

Missingersuusiordermut inatsimmi §§-it 2-miit 5-imut atorunnaarallarnissaannik, taamaalillunilu taakkua 1. januar 2019-imit 31 december 2021-mut atorneqannginnissaannik, Naalackersuisut siunnersuutaat (UKA 2018/192) Inatsisartut 2018-imi ukiakkut akuerimmassuk oqaatigineqasaaq. Aalajangersakkani ilaatigut pineqarpoq pisortat aningaasarnerrata ukiut sisamat ingerlaneranni oqimaatigiiiffiunissaannik imaluunniit sinneqartoorfiunissaannik piumasaaq. Piffissaq atorunnaarsitsiviusoq 31. december 2021-ip tungaanut ingerlavoq.

1.2 Ataatsimoortumik tullerriaarisarnissamik tunngavik

Ataatsimoortumik pingaarnersiulluni tullerriaarisarnermik periuseqarneq aningaasaqarnitta pilersaaruserneqarnerani pingaarnertut tunngaviuvoq. Aningaasaqarnerup naalackersuinikkut suliaqartunit paasineqarsinnaanissaata anguniarneqarnissaa aallaavigalugu aammalu siamasissumik tullerriaarinissap qulakkeerneqarnissaa periarfissaqaqqullugu tunngavik tamanna qitiulluinnarpoq. Aningaasaqarnitta pilersaarusernera paasilertoruminartumik ingerlallugulu inuiaqatigiit aningaasatigut pisinnaasaannut naleqqussakkamik aningaasartuutigit aqutsivigisinnaassagutsigit periuseq taanna aalajangiusimasariaqarparput. Aningaasanut inatsit Inatsisartunit, aningaasaliisarnermut oqartussaasuusunit aammalu aningaasaliissutit atorneqarnerannik nakkutilliisuusunit, akuersissutigineqartarpoq. Ukiumoortumik pingaarnersiulluni tullerriaarinq kingusinnerusukkut ilassutitut aningaasaliissuteqarnikkut aalajangiisuusumik allanngortinneqaqqusaanngilaq. Siumoortumik aningaasaliissuteqartoqarsimatinnagu aningaasaliissuteqartoqarsinnaanngilaq. Taamaattumillu iliuusissaq aningaasanut inatsimmi inatsisiniluunniit allani tunngavissinneqarsimatinnagu iliuusissap piviusunngortinneqarnissaa sioqqullugu aningaasaliissutigit tunngavissaq pissarsiarineqaqqaassaaq.

Naalackersuisunut oqaasertaliussakkut piginnaatitsissutit assiginngitsut Aningaasaqarnermut Akileraartarnermullu Ataatsimiititaliamit 2020-mut aningaasanut inatsisissatut siunnersuummik misissuinermit ataatillugu sukumiisumik misissorneqarput. Oqaasertaliussat tassaapput inatsimmi aalajangersakkat aningaasaliissutinik aqutsinermi tapertatut atorneqartut. Aningaasaliissutinik aqutsinermi tapertatut oqaasertaliussannik ilanngussinissap pisariaqassusia ataatsimiititaliamit qitiutillugu sammineqarpoq. Taamatut suliaqarnermi nanginnissaa ataatsimiititaliap siunertaraa. Suliassaqarfimmi pineqartumi qitiutillugu sammineqartumi ataatsimiititaliap sulinera aningaasanut inatsimmik ukioq manna suliaqarnerup allatut aallaaveqartinneqarnera pissutigalugu sulii siuarsimavallaanngilaq. Tamannali ima paasineqassanngilaq immikkut qitiutillugu sammineqartup tamatuma ataatsimiititaliamit pingaannginnerusunngortinneqarnera. Aningaasanut inatsimmi aningaasaliissutissat ukiumoortumik pingaarnersiorneqarlutik tullerriaarneqarnerisa Inatsisartut aningaasanut inatsimmik akuersinerisigit pinissaannik aammalu pingaarnersiulluni tullerriaarinerup tamatuma aalajangiisuusumik allanngortinneqartussaannnginnerannik isumaqarnini ataatsimiititaliap aalajangiusimavaa. Taamaattumillu oqaasertaliussat amerlassusiat sapinngisamik annertunerpaamik killilerneqartariaqartoq ataatsimiititaliamit aalajangiusimaneqarpoq.

Suliassaqarfiit 62-67 siorna ataatsimiititaliamit qitiutillugit sammineqarput. Suliassaqarfiit allat ukioq manna tikinneqassapput. Sulinermi tassani ingerlatsinermut kontot arlallit akornanni nuussinissamut piginnaatitsissutit kiisalu suliassaqarfiit akornanni nuussinissamik piginnaatitsissutit ataatsimiititaliamit qitiutinneqassapput. Tamanna ukiut aningaasanut inatsiseqarfiusut akornanni atuinerussutit atuinikinnerussutilluunniit nuunneqarsinnaanerinit piginnaatitsissutinut aamma atuuppoq. Aningaasanut inatsisikkut aningaasaliissutinik taamatullu Nunatta Karsiata naatsorsuutaani atuinerussutit atuinikinnerussutilluunniit ersarissuunissaannik ataatsimiititaliap kissaateqarnera tamatumani siunertarineqarpoq.

1.3 Aningaasanut inatsisissatut siunnersuummik siullermeerinnineq

2021-imi aningaasanut inatsisissatut siunnersuut Inatsisartunit ulloq 30. september 2020-mi siullermeerneqarpoq.

Aningaasanut inatsisissatut siunnersuutip siullermeerneqannginnerani Aningaasaqarnermut Akileraartarnermullu Ataatsimiititaliap isumaliutissiissusioreersimanissaa Inatsisartunut ilaasortat ilaannit naatsorsuutigineqartoq ataatsimiititaliamit maluginiarneqarpoq. Taamaattumillu apeqqut taanna pillugu inatsisikkut maleruagassiussinerup innersuussutiginnissaa ataatsimiititaliamit naleqquttuusorineqarpoq. Inatsisartut Naalakkersuisullu pillugit Inatsisartut inatsisaanni § 16, imm. 1 naapertorlugu aningaasanut inatsisissatut siunnersuutip siullermeerneqarnerata aappassaanerneqarneratalu akornanni aningaasanut inatsisissatut siunnersuummut Aningaasaqarnermut Akileraartarnermullu Ataatsimiititaliaq isumaliutissiissuteqassaaq. Tassa siunnersuutip siullermeerneqarnerata kingorna ataatsimiititaliaq aatsaat isumaliutissiissuteqartussaavoq. Siunnersuut aappassaanerinninnermi ataatsimiititaliamut suliarineqartussanngorlugu innersuunneqarpat ataatsimiititaliaq ilassutitut isumaliutissiissuteqassaaq.

Nalinginnaasumik oqaaseqaatit kiisalu siunnersuummi aningaasaliissutaaqqittussatut aningaasaliissutilluunniit ikilineqarnissaannik kissaatinik siunnersuutip siullermeerneqarnerani saqqummiussisoqarpoq. Ataatsimiititaliap isumaa malillugu saqqummiunneqartut amerlanersaat partiit akornanni kiisalu partiit Naalakkersuisullu akornanni aningaasanut inatsisissaq pillugu nalinginnaasumik oqaluserinninnermi ilanngutissallugit naleqqupput.

Suliassaqarfiilli ilaat aalajangersimasut sulinermini ataatsimiititaliap nammineq tikippai. Assersuutigalugu ilaatigut isumaginninnermut, ilinniartitaanermit, peqqinnissaqarfimmu kiisalu utoq-qarnut innarluutilinnullu suliassaqarfiit sipaaruteqarnermi eqqorneqannginnissaat ataatsimiititaliamit kissaatiginartinneqarpoq. Kiisalu innuttaasut akileraarutinit akitsuutinullu annertunerusumik artukkerneqannginnissaat ataatsimiititaliamit kissaatiginartinneqarpoq.

Akerlianik assersuutigalugu pisortat innuttaasunut samminnginnerusumik ingerlatsineranni kiisalu ataatsimiititaliap isumaa malillugu siunnersortinik atuinerujussuarmi annertuumik sipaaruteqarnissaq ataatsimiititaliamit kissaatiginartinneqarpoq.

Kiisalu ataatsimiititaliap sulinermini, minnerunngitsumillu Covid-19-ip malitsigisaanik ilassutitut aningaasaliissuteqarnissamik suliassanik suliarinninnermini pisortat sanaartugassaataasa sineri-

ammut tamarmut siammarneqarnissaannik, taamaalillunilu aamma illoqarfiit aalajangersimasuinnaat salliutinneqarnissaasa pinngitsoortinneqarnissaa pingaartissimagaa aaatsimiititaliamit aamma oqaatigineqassaaq.

Siunnersuutip siullermeerneqarnissaa sioqqullugu sulinerup ingerlasarnera:

Ataatsimiititaliap sulinerata juulip qaammataata naanerani imaluunniit aggustip qaammataata aallartinnerani aallartinnissaa ataatsimiititaliamit nalinginnaasumik kissaatigineqartarpoq. Tamatumani apequtaasarpoq aningaasanut inatsisissatut siunnersuut nipangiusimaneqartussaaq ataatsimiititaliap qaqugukkut Naalakkersuisunit tigoneraa. Tamatuma kingorna ataatsimiititaliap missingersuutit pillugit ukiumoortumik isumasioqatigiikkiartorluni aallartarpoq, tamannalu paasisassarsiorluni ataatsimeeqatiginninnernik takuniaanernillu ilaqartinneqartarpoq, soorlu tamanna immikkoortoq 1.4-mi matuma kingulianiittumi allaaserineqartoq.

Pisussanut pilersaarut erseqqinnerusumik aalajangersarneqarsimasooq malillugu aningaasanut inatsisissatut siunnersuummik pisarneq malillugu misissuinini missingersuutit pillugit Uummannami ulluni 24.-28. august 2020-mi isumasioqatigiinnermini ataatsimiititaliap aallarnerpaa. Taamatut aningaasanut inatsisissatut siunnersuummik misissuineq suliarinninnerlu Naalakkersuisunut arlalinnik apeqqusiornermik nalinginnaasumik malitseqartinneqartarpoq. Tamatuma ingerlanneqarneranut apeqqutinik suliaqarneq piffissamik sivisuumik atuiffiusinnaasarpoq. Tamatumalu kingorna apeqqutinut akissuteqarnissaminnut Naalakkersuisut piffissaaq sivisooq nalinginnaasumik atortarpaat. Naalakkersuisut akissutaat siunnersuummik siullermeerinninnissaaq sioqqullugu naammassineqareernissaa pitsaanerpaavoq. Taamaattorli taakku siunnersuummik siullermeerinereernerup kingorna ilaatigut tiguneqarsinnaasarput. Siunnersuummik siullermeerininnerup kingorna Inatsisartut inersuarmi isumaqatigiinniarnerat kiisalu Naalakkersuisut akissutaat tunngavigalugit siunnersuutip aappassaaneerneqarnissaa sioqqullugu akineqartussanik ataatsimiititaliap apeqquteqaqqinneratigut tamanna uteqqinneqartarpoq. Periuseq taanna aappassaaneerinninnerup pingajussaaneerinninnerullu akornanni uteqqinneqaqqittarpoq.

Ataatsimiititaliap aningaasanut inatsimmik ukioq manna suliarinninnera allatut ingerlavoq, tamannalu tunngaveqarpoq. Sulinerup ingerlanerata allanngortinneratigut ataatsimiititaliamut pingaaruteqarsimavoq takutissallugu Inatsisartut tassaasut killissanik aalajangersaasartut. Naalakkersuisut aningaasanut inatsisissatut siunnersuummik annertuumik amigartoorfiusussamik saqqummiussisut ataatsimiititaliamit paasineqarpoq, tamannalu akuersaarnartinneqanngilaq, tassami ataatsimiititaliamit naatsorsuutigineqarmat aningaasanut inatsisip oqimaaqatigiinnissaanik imaluunniit sinneqartoorfiunissaanik aningaasaqarnikkut manna tikillugu periuserineqartoq Naalakkersuisunit malinneqassasoq. Taamaattumillu aningaasanut inatsisip oqimaaqatigiinneranik imaluunniit sinneqartoorfiuneranik qulakkeerinnittumik Naalakkersuisut siunnersuummik saqqummiussinissamik piumasaqarfigineqarnissaat ataatsimiititaliamit isumaqatigiittumit aalajangiunneqarpoq. Aningaasanut inatsimmik suliarinninneq annertoreermat ataatsimiititaliap piumasaqaataanik Naalakkersuisut malinninnissaasa utaqqineqarnissaa naapertuunnerpaajusutut ataatsimiititaliamit isigineqarpoq.

1.4 Aningaasaqarnermut Ataatsimiititaliap aallarniutitut oqaaseqaatai

Naalackersuisut 2021-mi aningaasanut inatsisissatut siunnersuutaannik Aningaasaqarnermut Akileraartarnermullu Ataatsimiititaliap suliarinninnera aningaasanut inatsisissatut siunnersuutip immikkut piunasaqaatitallip ulloq 20. august ataatsimiititaliamit tiguneqarneranik ukioq manna aallarnerneqarpoq. Naallu aningaasanut inatsisissatut siunnersuut kingusinnerpaamik ukioq aningaasanut inatsiseqarfissaq sioqqullugu ulloq 1. september saqqummiutereerneqartussaagaluortoq, tamanna pisarnermit kingusinnerusukkut pivoq. Tamannali ilimagineqareersimavoq, ataatsimiititaliarmi tamanna pillugu juunip aallartinnerani ilisimatinneqarmat. Covid-19-eqalernerata aningaasaliissutissanik aammalu aningaasaliissuteqartarnermik inatsisinik suliaqarnermut annertuumik kinguneqarsimanera aammalu suleriaatsinik pisarnerlu malillugu ingerlatseriaatsinik atuutunik annertuumik allannguinerup kiisalu IT atorlugu aqqissuussinerit nutaat pisariunerusumik kinguaattoorfiusumillu ingerlasoqarneranik kinguneqarsimanerat Naalackersuisunit tunngavilersuutigineqarput.

Aningaasanut inatsisissatut siunnersuutip tiguneqarata aqaguani siunnersuut misissorniarlugu ataatsimiititaliaq ukiumoortumik missingersuutit pillugit isumasioqatigiikkiartorluni aallarpoq. Missingersuutit pillugit isumasioqatigiinneq ulluni 24.-28. august 2020 Uummannami ingerlanneqarpoq. Naalackersuisut inatsisissatut siunnersuutaat ataatsimiititaliamit akuersaarneqarsinnaangitsumik annertussuseqartumik amigartoorfiusussaasoq ataatsimiititaliap siunnersuummik misissuinermini isumaqarfigaa. Naalackersuisunut ulloq 31. august allakkani sipaarutissatut siunnersuutininik tigussaanagerusunik, aningaasat ukiuanni 2021-mi kiisalu tamatuma kingorna ukiuni missingersuusiorfiusuni pingasuni aningaasanut inatsisip oqimaaqatigiinnissaanik imaluunniit sinneqartoorfiunissaanik qulakkeerinnissinnaasunik, Naalackersuisunit nassinneqarnissani ataatsimiititaliap piunasaqaatigaa. Pissutsit taamaatsillugit ukiup tullianut aningaasanut inatsisissatut siunnersuutip, ukiut missingersuusiorfiit ilanngullugit, tamakkiisumik aningaasalersorneqarsimanissaa akisussaassuseqarnerpaatut ataatsimiititaliamit isigineqarsimavoq. Aningaasanut inatsisissatut siunnersuut iluarsisaq Naalackersuisut nassiuppassuk ataatsimiititaliap sulinini nangissamaarsimavaa. Siunnersuummik aningaasanut inatsisip oqimaaqatigiiffiuneranik takutitsisumik suliaqarnissaq, taamaalillunilu ataatsimiititaliap Naalackersuisullu marloqiusamik sulinissaasa pinngitsoortinneqarnissaa, naapertuunnerpaatut allaffissornikkullu piffissamik sipaarnarnerpaasussatut ataatsimiititaliamit isigineqarpoq.

Allakkani 2. septembarimeersuni Naalackersuisut paasissutissiissutigaa ukiut tamaasa pisarnertut siunnersuutip aappassaaneerneqarnissaanut pingajussaaneerneqarnissaanullu allannguutissatut siunnersuutininik takkuttoqarumaartoq. Sipaarutissat annertuut aningaasanut inatsisissatut siunnersuummut ilanngunneqareersut Naalackersuisut paasissutissiissutigaa. Taamaattumillu sipaarutissatut siunnersuutininik ataatsimiititaliaq Naalackersuisunit tigusaqanngilaq. Ataatsimiititaliap allagai Naalackersuisullu akissutaat ilanngussaq A-tut aamma B-tut ilanngunneqarput. Taamatuttaaq Naalackersuisut aningaasanut inatsisissatut siunnersuutaannik misissuinermini amigartooruteqarnissamik missingersuuteqarneq Naalackersuisunit isummerfigineqarnersoq – taamaappallu qanoq isummerfigineqarnersoq – ataatsimiititaliamit takuneqarsinnaasimannigilaq. Aningaasanut

inatsisissatut siunnersuummi ikiuutaasinnaasut tigussaasut annikitsuinnaammata Naalakkersuisut sipaarutissatut siunnersuutinik tigussaasunik saqqummiussinissaannik piumasaqaatini ataatsimiititaliap aalajangiusimavaa. Tamanna pivoq allakkani 15. septembarimeersuni. Karsimik misissuinnermit misilittakkat pitsaasut ukioq manna amigartoorutissatut missingersuutigineqartut aningaasalersuutissaannik Naalakkersuisut nassaarsinnaasimanerannik takutitsisut ataatsimiititaliamit Naalakkersuisunut eqqaasitsissutigineqarput.

Kiisalu ungasissoq isigalugu aningaasaqarnerup attanneqarsinnaanerata tutsuiginartuunissaanik pilersitsinissami karsimik misissuineq iliuitsitut pingaarutilittut Naalakkersuisunit isigineqartoq ataatsimiititaliamit Naalakkersuisunut eqqaasitsissutigineqarpoq. Aammattaaq siunissami assinganik iliornissaq pisariaqarsinnaasooq Naalakkersuisunit oqaatigineqarpoq. Kiisalu taarsigassarsinissaq sioqqullugu Namminersorlutik Oqartussat sipaaruteqarsinnaanerminnik oqariartuuteqarsinnaanerata taarsigassarsiffissanut aalajangiisuusussatut Naalakkersuisunit nalilerneqarpoq. Tamanna aningaasaqarnikkut akisussaassuseqartumik ingerlatsinikkut ukiuni tulliuuttuni taarsigassarsianik Namminersorlutik Oqartussat akilersuisinnaassuseqarnerannik oqariartornerussasooq Naalakkersuisut isumaqarput.

Aningaasat ukiuanni 2021-imi 183,2 mio. kr.-inik amigartooruteqarnissaq sulinissami aallaavigissallugu akuersaarneqarsinnaanngitsoq ataatsimiititaliamit aalajangiusimaneqarpoq. Pisariaqartunik sipaaruteqarnissamut Namminersorlutik Oqartussat piumassuseqarlutillu sapinnginnerannik Naalakkersuisut maannangaaq avammut takutitsinissaannut piffissanngortoq ataatsimiititaliaq isumaqarpoq. Tamanna minnerunngitsumik atuuppoq piffissami matumani aningaasaqarnikkut inissisimanerup annertuumik nalorninartoqarfiani.

Naalakkersuisut akissutaanni aatsaallu sapaatit akunnerisa tallimat qaangiunneranni ulloq 20. oktober tiguneqartumi, siullermik akissutit innersuussutigineqarnerisa saniatigut, suliami nutaarsiassartaqanngilaq. Naalakkersuisut iliusaat missingersuutit immikkut annertooujussuarmik amigartoorfiunissaannut tunngatillugu ajornartorsiutit annertuut aaqqiivigineqarnissaannut suleqatiginnikkusunnngissuseqarnertut ataatsimiititaliamit isigineqarput. Tamanna ataatsimiititaliamit assut isornartoqartinneqarpoq. Ataatsimiititaliap allagai Naalakkersuisullu akissutaat ilanngussaq C-tut aamma D-tut ilanngunneqarput.

Naalakkersuisut sipaarutissatut siunnersuutinik tigussaasunik saqqummiussinissaannik piumasaqaatini ataatsimiititaliap ulloq 3. november uteqqippaa. Siunnersuutip aappassaaneerneqarnissaannut allakkanut taakkununnga akissummik ataatsimiititaliaq suli tigusaqanngilaq. Ataatsimiititaliap allagaa ilanngussaq E-tut ilanngunneqarpoq.

Allakkanut taakkununnga akissummik ataatsimiititaliaq tigusaqanngimmat allaqatigiinnerup inaarneqarnissaa aammalu suliaq pillugu ataatsimiititaliap sulinerata ingerlateqqinnissaa siunertaralugu Aningaasaqarnermut Naalakkersuisooq siunersiuinissamut ataatsimiititaliamit aggersarneqarpoq. Siunersuineq pivoq sapaat ulloq 8. november. Ataatsimiigiaqqusissut Naalakkersuisullu oqaasiisa allattorsimaffiat ilanngussaq F aamma G-itut ilanngunneqarput.

Siunnersiunerup kingorna oqaatigineqassaaq aningaasanut inatsisissap oqimaaqatigiiffiunissaanik ataatsimiititaliap piumasaqaataa Naalakkersuisut aappasaanerinninnermut allannguutissatut siunnersuutaasigut eqquutsinneqarsinnaanngimmat.

Immikkoortumi siuliani ataatsimiititaliap ukioq manna sulineranut tunngasumi oqaatigineqartutut ukiunut siuliinut sanilliullugu ataatsimiititaliap ukioq manna sulinera allaasimavoq, tamannalu tunngaveqarpoq. Pissutsit siuliani taaneqartut saniatigut Naalakkersuisut allannguutissatut siunnersuutaat kingusissupilussuakkut takkuppet. Taamaattumillu taakku pillugit ataatsimiititaliami naapeqatigiinniarnissap anguniarneqarnissaa ajornakusoorsimavoq. Allannguutissatut siunnersuutinut nr. 27-mut aamma 33-mut ataatsimiititaliap isummernissaata kinguartinneqarneranut tamanna pissutaavoq. Tamatumalu kingunerisaanik siunnersuutip aappasaaneerpeqarnerata kingorna allannguutissatut siunnersuutit taakku ataatsimiititaliamit tikinneqartariaqassapput. Kiisalu ataatsimiititaliap apeqquiterpassuinit Naalakkersuisut akissutaasa suliarinissaat piffissaq pissutigalugu ataatsimiititaliamit angumerineqarsinnaasimangilaq. Tamatumalu kingunerisaanik siunnersuutip aappasaaneerpeqarnerata kingorna akissuteqaatit taakku ataatsimiititaliamit tikinneqartariaqassapput.

Tamatuma saniatigut suliap tamatuma kingunerivaa aningaasanut inatsisissatut siunnersuummik ataatsimiititaliap suliarinninnerata assut kinguartoorfiunera, tassa ataatsimiititaliap apeqqueterqarnera, taamaalillunilu aamma Naalakkersuisut akissuteqarnerat kingusissorujussuakkut pimmat. Pissutsit taakku kinguneraat Inatsisartut aningaasanut inatsimmut tunngasumik sulinerat kinguartoormat. Kiisalu ilaasunik angallassineq pillugu kiffartuussinissamik isumaqatigiissutit pillugit Naalakkersuisut ilassutitut aningaasaliissuteqarnissamik qinnuteqaataata imartoorujussuup ataatsimiititaliamit suliarineqarnissaanut piffissarujussuarmik atuisariaqarsimaneq pitsanngorsaataanngilaq. Allannguutissatut siunnersuutit kingunerisassaataat immikkoortoq 2-mi matuma kingornaniittumi taaneqarput.

Aningaasaqarnikkut maanna inissisimaneq pillugu:

Kalaallit Nunaata Aningaasaqarneranut Siunnersuisoqatigiinnik ukiumoortumik ataatsimeeqatiginninnini ataatsimiititaliap ulloq 21. september ingerlallappaa. Siunnersuisoqatigiit isumaat malillugu Kalaallit Nunaata aningaasaqarnera nunanit allanit amerlanernit sakkukinnerusumik eqqugaavoq. Kiisalu Siunnersuisoqatigiit naatsorsuutigaat 2020-mi siuariartoqassanngitsoq, taamaalillunilu ingerlatat 2019-imisut annertussuseqassasut.

Ikiorsiissutinut, pisarialinnik timmisartuussinernut il.il. aningaasartuuteqarnermik aammalu ilaatigut pisuussutinik atuinermut akitsuutinit akileraarutitigut isertitat ikiliartornerannik nunatta karsia sunnerneqarpoq. Taamaalillunilu pisortat aningaasaqarneranni ukiuni arlalinni sinneqartooruteqarsimaneq 2020-mi malunnaateqarluartumik amigartooruteqarninngussaaq aammalu 2021-mi amigartooruteqarnissaaq ilanngullugu naatsorsuutigineqartariaqarluni. Naliliigallarneq malillugu 2020-mi amigartoorutissat 500 mio. kr.-it missaanniissinnaasut 2021-milu 180 mio. kr.-erluinnarnik amigartooruteqarnissaaq aningaasanut inatsisissatut siunnersuummi naatsorsuutigi-

neqarpoq. Amigartooruteqarnissap aammalu akiitsut qaffakkiartuinnarnissaasa pinngitsoortinneqarnissaat aallaavigalugu aningaasaqarnikkut politikip ingerlanneqarsimanera pissutigierpiarlugu taamatut politikeqarnissamut inissaqarsimasoq Siunnersuisoqatigiit isumaqarput.

Coronali pillugu ajornartoorneq akilerneqartariaqartumik akiligassaqaalersitsivoq, tamannalu aningaasaqarnikkut politikimut annertuumik piunasaqarfusoq Siunnersuisoqatigiit isumaqarput. Akiitsornissaq pinngitsoorniarlugu sinneqartooruteqarnissaq anguniagaralugu siunissami aningaasaqarnikkut politimik aqutsinissaq pisariaqarpoq.

Siumut isigisumik sinneqartooruteqarnissaq anguniarlugu aqutsinissap pisariaqarneranik Siunnersuisoqatigiit oqarnerat Aningaasaqarnermut Akileraartarnermullu Ataatsimiititaliamit isumaqatigineqarpoq, tamatumani akiitsornissap pinngitsoortinneqarnissaa kisiat pinnagu, aammali aningaasanut inatsisip oqimaaqatigiiffiunissaanik sinneqartooruteqarfiunissaanilluunniit qulakkeerinninnissamik anguniagaqarneq ingerlatiinnarneqaqqullugu. Tamatuma saniatigut amigartooruteqarnissamik missingersuuteqarnerup sapinngisamik sukkanerpaamik qanoq iliornikkut nulinnortinneqarsinnaanerata maannangaaq suliniutigineqalereernissaa ataatsimiititaliamit kissaataagaluarpoq.

2021-mi aningaasanut inatsisissatut siunnersuut maanna coronap atuunneranik taassumalu sunniutaanik arlalitsigut sunnerneqartoq inatsisissatut siunnersuummut Naalakkersuisut nassuiaataani uppersarneqarpoq. Tassani sunniutit taakku qanoq annertutiginissaat qanorlu siviutiginissaat aamma annertuumik nalornissutaalluni, qanoq siunissami isertitat aningaasartuutillu ineriartornerannut sunniuteqarnissaa ilanngullugu. Tamatuma saniatigut nunatta karsiata 2020-mut naatsorsuutai 2020-mi aningaasanut inatsimmi anguniakkamut sanilliullugu uuttortaraanni annertuumik ajornerujumaarnerat Naalakkersuisunit naatsorsuutigineqarpoq.

Siuliani taaneqartutut sipaarutissatut siunnersuutinik ataatsimiititaliaq Naalakkersuisunit tigusaqanngilaq. 2021-mi aningaasaqarnermut politikimik qasukkartitsigallarnissaq 2022-2024-milu IS-ip inerneranik oqimaaqatigiissitsisumik kigaatsumik sakkortusiartortitsinissaq Naalakkersuisunit toqqarneqarpoq, soorlu tamanna Naalakkersuisut saqqummiussissutaanni aamma allassimasoq.

Coronamut tunngasumik pissutsit taassumalu sunniutai Naalakkersuisut tungaannit isigalugu 2021-mi aningaasanut inatsisissamut assut sunniuteqartut Aningaasaqarnermut Ataatsimiititaliamit maliginiarneqarpoq. Minnerunngitsumik takornariaqarneq angallannerlu piffissami siviunerusumi tapersiissutinik iliuuseqarfigineqarnissamik piariaqartitsinnaanerat Naalakkersuisunit mattunneqanngilaq. Kiisalu COVID-19-ip siullermik 2021-mi sunniutigisinnaasaanik AIS2021-mi IS-mi angusanut tunngavissat ukiumut nalinginnaasumut sanilliullutik annertunerujussuarmik nalorninaateqartut Naalakkersuisut paasissutissiissutigaat.

Aningaasanut inatsisissatut siunnersuummut nalinginnaasumik nassuiaatit atuaraanni isumaqarpoq coronamut tunngasumik pissutsit Naalakkersuisunit utaqqimaartumik pissuseqarfigineqartut. Naalakkersuisummi paasissutissiissutigaat inuussutissarsiortunut suliffissaqartitsinarnermulluunniit sammisumik arlaatigut ikiorsiissuteqarnissamut aningaasanik immikkoortitsinissamik ilanngussisoqarsimangitsoq. Aammalu ikiorsiissutit pillugit ilisimatitsissutitut suliaq

kingulleq Naalakkersuisuneersoq coronamut tunngasumik pissutsit tamatumalu kingunerisai pillugit Naalakkersuisut iliuuseqalersaarnerannik ersersitsinngilaq. Coronamut tunngasumik pissutsit tamatumalu kingunerisaasa 31. decemberip kingorna ingerlaqqissinnaanerit Naalakkersuisunit isiginngitsuusaarneqarsinnaanngitsoq ataatsimiititaliaq isumaqarpoq. Coronamut tunngasumik pissutsit immikkut ittuupput inuiaqatigiinnut kalaallinut akornusiisinnaanerit annikillisarnerilugu immikkut ittumik iliuuseqarfigineqartariaqartut. Taamaattumillu coronamut tunngasumik pissutsit sivitsortussatut ilimananluinnartut sivisuumik atuutissagaluarpata aningaasaqarnikkut ungasissumut isigaluni unammillernartut qitiutillugit Naalakkersuisunit isumagineqarnissaat pillugit aningaasaqarnikkut anguniakkat ersarissut amigaatigineqartut ataatsimiititaliaq isumaqarpoq.

Aningaasanut inatsisissatut siunnersuut siumoortumik iluarsiiisuteqarfiunani siulianilu taaneqartutut amigartooruteqarnissamik missingersuuteqarfiulluni ulloq 30. september siullermeerneqarpoq. Maleruagassat tungaannit isigalugu aningaasanut inatsisissatut siunnersuutip aningaasanulluunniit inatsisip inaarutaasup amigartooruteqarfiunissaata missingersuutigineqarnissaanut akornutissaqanngilaq. Tamatumunnga pissutaavoq missingersuusiornermut inatsimmi tamanna pillugu aalajangersakkat piffissami 1. januar 2019-imit 31. december 2021-mut atorunnaarsineqarallarnerat. Aalajangersakkani ilaatigut pineqarpoq pisortat aningaasaqarnerata ukiut sisamat ingerlaneranni oqimaaqatigiiffiunissaanik imaluunniit sinneqartoorfiunissaanik piumasaqaat. Atorunnaarsitsisoqaraluartoq taamatut politikeqarnek Naalakkersuisunit manna tikillugu aalajangiusimaneqartarsimavoq.

Taamatullu politikeqarnerup 2021-mi aningaasanut inatsisissatut siunnersuummik suliarinninnermi aalajangiusimaneqaannarnissaa ataatsimiititaliamit kissaatigineqarsimavoq. Tamatumunngalu pingaarnertut pissutaavoq COVID19-ip pilersitaanik nunatsinni aningaasaqarnikkut assut nalorninartumik maanna inissisimaneq. Tamanna ataatsimiititaliamit qanimut malinnaavigineqarpoq ajornartorsiortitsineralu qanoq sivisutigissanersoq aammalu aningaasanut inatsimmut qanoq annertutigisumik sunnuteqassanersoq takujuminaallunilu. Pissutsit taamaatsillugit ukiumut tullermut aningaasanut inatsisissap, taamatullu tamatuma kingorna ukiut missingersuusiorfiit ilanngullugit, oqimaaqatigiiffiunissaa imaluunniit sinneqartoorfiunissaa akisussaassuseqarnerpaajussasoq ataatsimiititaliaq isumaqarpoq. Tassunga atatillugu ataatsimiititaliaq isumaqarpoq aningaasanut inatsisissatut siunnersuummik suliarinninnermut atatillugu nunatta karsiata aningaasanik tigoraaannarnik upalungaarsimasuuteqarnissaa immikkut mianerisassaasoq.

Aningaaserivinni taarsigassarsiniarnissamik – aamma aappaagu aningaasanut inatsit amigartoorfiussagaluarpalluunniit - Naalakkersuisut pilersaaruteqanngitsut ataatsimiititaliap tusagassiorfinnit ulloq 16. november 2020-mi paasivaa.

Nunani allani aningaasanik amerlasuunik taarsigassarsiniartariaqarnerup immaqa pisariaqarunnaarsimanera ataatsimiititaliamit pitsaasutut isigineqarpoq. Namminersorlutik Oqartussat sinnerlugit 1,5 mia. kr.-it tungaannut Aningaasaqarnermut Akileraartarnermullu Ataatsimiititaliamit akuerineqartumik taarsigassarsiniarnissamut piginnaatinneqarnissartik Naalakkersuisut

kissaatigigaat 2021-mut aningaasanut inatsisissatut Naalakkersuisut siunnersuutaanni allassimavoq. COVID-19-ip 2020-mi Nunatta Karsianut annertuumik aningaasartuuteqartitsisup, tamatumalu peqatigisaanik Nunatta Karsiata isertitassaatur missingersuutigineqarlutik naatsorsuutigineqartut ajorseriarnerannik pilersitsisup, nassatarisaanik piginnaatitsissutip taassuma ilannguneqarnissaa Naalakkersuisut kissaatigaat. Tamatuma peqatigisaanik ataatsimiititaliamit maluginiarneqarpoq paasissutissaq taanna aappassaaneerinninnissamut allannguutissatut siunnersuuteqarnissamut tunngavissiiingitsoq. Maannangaarlu ataatsimiititaliamit naatsorsuutigineqarpoq piginnaatitsissut siuliani taaneqartoq aammalu aninganut inatsimmi aningaasaliissutit tassunga attuumasut pillugit pingajussaaneerinninnissamut allannguutissatut siunnersuuteqartoqassasoq. Kiisalu aningaasanut inatsisip aappaagu minusimiinginnissaanik Aningaasaqarnermut Akileraartarnermullu Ataatsimiititaliap piunasaqataa Naalakkersuisunit malinneqarsinnaanngitsoq ataatsimiititaliamit tusagassiorfinnit ulloq 16. november 2020-mi paasineqarpoq. Tusagassiorfinnut nalunaarummi allassimavoq Aningaasaqarnermut Akileraartarnermullu Ataatsimiititaliap naaperialaarnissaanut Naalakkersuisut piareersimasut. Naalakkersuisulli oqarsinnaanngillat qanoq annertutigisumik, ataatsimiititaliali piunasaqataa qaninneralaararsuullugu oqaatigaat. Taamaattumillu apeqqutinut tusagassiorfinnut nalunaarummut tunngasunut akissuteqarnissaq ataatsimiititaliamit ujartorneqarpoq. Taanna isumaliutissiissummut ilanngussaq H-tut ilannguneqarpoq.

Ingerlatsivinnik, suliffeqarfinnik kattuffinnillu assigiinngitsunik ataatsimeeqateqarneq.

Sulinerminut atatillugu ataatsimiititaliap kattuffiit ingerlatsiviillu assigiinngitsut arlallit ataatsimeeqatigai. Kommune Qeqertalik, Kommune Kujalleq, SIK, GE, Royal Greenland. Ataatsimiinnerit sassartitsinertut ingerlanneqarput. Tamatumani ataatsimiititaliaq sassartinneqartunut apeqquteqarnissamut periarfissillugu sassartinneqartut oqariartuutiminnik saqqummiussinissaminnut periarfissinneqartarput.

Tamatuma saniatigut missingersuutit pillugit isumasioqatigiinnermini Avannaata Kommunianit aammalu Kommune Qeqertaliup sinniisunik naapitsinini ataatsimiititaliap nuannaarutigaa. Ataatsimiinnerit taakku ilisimatitsiffiusumik ataatsimiinnertut ingerlanneqarput, tamatumani qulequttat kommunit ataatsimiititaliamut saqqummiutissallugit kissaatigisaanik saqqummius-sivigineqarnissaminut ataatsimiititaliaq periarfissinneqarpoq.

Kiisalu Aasianni GUX aamma Ado Lyngep Atuarfia ataatsimiititaliamit takuniaavigineqarput kiisalu Kangaatsiaq Qasigiannguillu tikeraarneqarlutik ataatsimiititaliap kommunip sinniisuanik naapitsivigisaanik. Kangaatsiami Nukissiorftiit sinniisui erngup nukinganik nukissiorfik qulequtaralugu ilisimatitsiffiusumik ataatsimeeqatigineqarput. Tamatuma saniatigut Ummanna-miinnermini ataatsimiititaliap nunaqarfik Saattut tikeraarpaa.

Inatsisartut ataatsimiititaliaannit marlunnit saaffiginnissutinik ataatsimiititaliaq tigusaqarpoq. Ilaqutariinnermut Peqqissutsimullu Ataatsimiititaliaq aamma Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq Ado Lyngep Atuarfia pillugu Aningaasaqarnermut Akileraartarnermullu Ataatsimiititaliamut saaffiginnissuteqarput.

Kiisalu KNI Pilersuisup illoqarfinni suliffeqarfinnik namminersortunik unammillerfiusussani immikkoortortanik pilersitsiniarnera pillugu ataatsimiititaliaq Sulisitsisunit allakkatigut saaffiginnissummik tigusaqarpoq.

Allakkatigut saaffiginnissutininik tigusaqarnermi imaluunniit avataaneersunik paasissutissiiffiuninik ilisimatitsiiffiunilluunniit – assersuutigalugu sassartitsinikkut - ataatsimeeqateqarnermi isummernermit aalajangersimasumut ataatsimiititaliap pituttortannginnera saqqummiunneqartulli assigiinngitsut ataatsimiititaliap isumaliutiginneqqinneranut ilanngunneqartarnerat ileqquuvoq. Tamanna aamma atuuppoq siuliani taaneqartuni. Suliani aningaasanut inatsimmut toqqaanartumik attuumassuteqartuni saqqummiunneqartut assigiinngitsut aningaasanut inatsimmik suliarinninnermini ataatsimiititaliap ilannguttarpai, tassa suliat aningaasanut inatsimmi aningaasaliissutinut oqaasertaliussanulluunniit immikkut attuumassuteqaraangata.

AIS2021-mik suliarinninnerup ingerlaqqinnerani suliassaqarfiit allat ataatsimiititaliamit qitiutinneqartussat.

Immikkoortoq 1.2-mi siulianittumi oqaatigineqartutut oqaasertaliussat aqqutigalugit aningaasanut inatsimmi piginnaatitsissutit assigiinngitsut ataatsimiititaliamit misissuiffigineqalersaarput. Aningaasaliissutinik aqutsinermi tapertatut atorneqartussatut siunertaminnik taakku eqquutsinissaat pingaaruteqarpoq. Aningaasanut inatsisip Nunattalu Karsiata naatsorsuutaasa akornanni ataqatigiinnerup ersarinnerulernissaanut oqaasertaliussat peqataaqataanissaat ataatsimiititaliamit kissaatigineqarpoq. Taamaattumillu oqaasertaliussat sapinngisamik annertunerpaamik ikisarneqarnissaat siuliani taaneqartutut ataatsimiititaliamit aalajangiusimaneqarpoq.

Qitiutillugu sammisassat aappaattut sunniutinik uuttortaaneq aningaasaliissutit iluaqutaassuseqarnerannik uuttortaanissamut sakkussatut pitsaasutut ataatsimiititaliamit isigineqarpoq. Aningaasaliissutit iluaqutaassuseqarnerisa takuneqarsinnaanissaa aammalu aningaasat qanoq amerlatiginerat apeqqutaatinnagu taakku naatsorsuutigineqartumik sunniuteqarnissaat ataatsimiititaliamit pingaartutut isigineqarpoq. Tamatumalu aamma kingunerissavaa aningaasaliissuteqarnermi kissaatigineqartup anguneqarnerata uppersarneqarsinnaanissaa.

Namminersorlutik Oqartussani qitiusumik allaffeqarfinni, ingerlatsivinni kiisalu suliffeqarfinni namminersortitani siunnersortininik atuinerup erseqqinnerusumik misissuiffigineqarnissaa ataatsimiititaliamit toqarneqarpoq. Inatsisartut Nunatta Karsiata naatsorsuutaanik aappasaanerinninnerisa takutippaa siunnersortinut aningaasartuuterpassuit atorneqartut iluaqutaassusiannik takunninnissamik Inatsisartunut ilaasortat akornanni annertuumik pisariaqartitsisoqartoq aammalu aningaasaliissutit sapinngisamik annertunerpaamik iluaqutaanissaat qulakkeerumallugu aningaasaliissutinik aqutsinerup qanoq patajaallisarneqarsinnaanera assut soqutigineqartoq.

Aningaasanut inatsimmi aningaasaliissutit kontonut pingaarnernut aningaasaliissutigineqartarput. Taamaattumillu kontot pingaarnarit sorliit siunnersortinut atuiffiusimanersut tamakkiisumik paasisaqarfigissallugu aammalu paasissutissiissutit tamatuma aningaasat ukiuini tamani nutarterneqartarnissaa ataatsimiititaliamit assut kissaatigineqarpoq. Paasissutissiineq taanna kontoni pingaarnerni suliassanut kisitsisit ilaattut tunniunneqartariaqarpoq. Aningaasat ukiuannut 2019-imut tunngatillugu paasissutissiissut taanna skemanngorlugu takutinneqarsinnaavoq.

2. Naalakkersuisut allannguutissatut siunnersuutaat

Allannguutissatut akuerineqassappata AIS2021-p appassaaneerneqarnerani IST-p IS-illu inernerannut sunniutissat tamarmiusut takussutissiami matuma kingulianiittumi takutinneqarput.

Aningaasat mio. kr.-nngorlugit.	2021	2022	2023	2024
AIS2021-mi IST-p inernera	173,0	7,4	-39,0	-6,9
AIS2021-mi IS-ip inernera	183,2	17,6	-28,8	3,3
Allannguutissatut siunnersuutip aappassaaneerneqarnerani IST-p inerneranut sunniutissat	-2,6	-4,1	0,9	-4,1
IST-p inerneranik aappassaaneerinneq	170,5	3,3	-38,0	-11,0
IS-ip inerneranik aappassaaneerinneq	180,7	13,3	-28,0	-1,0

Allannguutissatut siunnersuutip aappassaaneerneqarnissaanut saqqummiunneqarneratut isikkoqartillugu akuerineqassappat 2021-mi IS-ip inernera 180,7 mio. kr.-nik amigartooruteqassaaq. 2021-mit 2024-mut aningaasanut inatsiseqarfiusumi 165,0 mio. kr.-t amigartoorutigineqassapput.

Tamatuma saniatigut Naalakkersuisut ima paasissutissiipput:

“Pingajussaaneerinninnissamut allannguutissatut siunnersuutit inernerit taakkua allanngortissavaat. Ilaatigut Inatsisartunit suut akuerineqarnersut kiisalu aningaasanut inatsisissaq pillugu partiinik isumaqatiginninniarnert Naalakkersuisullu aalajangiussaata apeqqutaassapput. Aningaasanut inatsisissap isumaqatiginninniutigineqarnerani partiit arlalinnit kissaatigisatut oqaatigineqartut naapertorlugit 2021-mit 2024-mut aningaasanut inatsiseqarfiusumut isertitat aningaasartuutillu akornanni oqimaaqatigiitsitsiniarnermut atatillugu annertuumik allannguuteqartoqarnissaa naatsorsuutigineqarpoq. Taamaalilluni isertitat aningaasartuutillu oqimaaqatigiitsillunnarnerisigut 2021-mit 2024-mut aningaasanut inatsiseqarfiusumut missingersuutit 165,0 mio. kr.-nik pitsanngoriassapput.

Missingiineq matumani akileraarutinit akitsuutinillu, tassunga ilanngullugit aalisarnermi akitsuutinit isertitassatut missingersuutit qaammatit qulingiluani kisitsisit oktoberip qiteqqunnerani piulertussat tunngavigalugit nutarterneqartussaaneeri sillimaffigineqarsimangillat. Tassunga atatillugu raajat akiisa 2019-imi kilomut 30,24 kr.-mit 2020-p sisamararterutaata siullermi 29,46-mut apparnikuuneri pingaaruteqarput. Akit 2020-p sisamararterutaata siullermi kilomut 25,46 kr.-mut appaqqipput 2020-lli sisamararterutaata pingajuanni kilomut 27,24 kr.-nut amerliallassimallutik. Ukioq manna ukiullu tulliani akit

appaqqissanersut oqaatigiuminaappoq, taamaattorli aallaaviatigut akit appariarneri taaneqartut 2021-mit isertitat ukiumut 30 mio. kr.-nik annertussusilinnik appariarnerannik kinguneqarnissaa naatsorsuutigineqarpoq.”

Ulloq 8. november siunersiuinerup siuliani taaneqartup kingorna paasinarsivoq ukiuni tulliuuttuni sisamani aningaasanut inatsiseqarfiusumi oqimaaqatigiittoqarnissaanik ataatsimiititaliap piumasaqaataa Naalakkersuisut sipaarutissatut pilersaarutaasigut equutsinneqarsinnaanngitsoq. Aningaasaqarnermut Naalakkersuisup paasissutissiissutigaa siunnersuummi sipaarutissat annertuut ilanngunneqareersut aammalu aningaasanut inatsisip ukiuani 2021-mi amigartoorutit tassaasut Coronap nunarsuatsinni tuniluunnera pissutigalugu akileraarutinit akitsuutinillu 2021-mi isertitassatut missingerneqartut appartikkallarnerat.

Kiisalu Naalakkersuisup paasissutissiissutigaa siunnersuutip pingajussaaneerneqarnissaanut allannguutissatut siunnersuutigisassatut naatsorsuutigineqartutigit ukiut missingersuusiorfiusut sisamat ingerlaneranni amigartoorutissatut missingersuutigineqartut nulinnngorlugit appartinneqarsinnaassanngitsut. Pingajussaaneerinninnissamut allannguutissatut siunnersuutissat pilersaarutaasut piffissami missingersuuteqarfiusumi katillugit 25,5 mio. kr.-inik missingersuutininik pitsanngoriartitsinissaat Naalakkersuisunit naatsorsuutigineqarpoq. Tamatuma kingorna piffissap missingersuuteqarfiusup ingerlanerani amigartoorutissatut missingersuutigineqartut 139,9 mio. kr.-iussapput. Naatsorsuinermi tassani kiffartuussinissamik isumaqatigiissuteqarnek tunngavigalugu aningaasat 53,7 mio. kr.-it atorneqarsinnaalertut peqatigalugit piffissap missingersuuteqarfiusup ingerlanerani akileraarutinit akitsuutinillu isertitassatut missingikkanut allannguutit 92,8 mio. kr.-it ilaapput, taakkulu piffissami missingersuusiorfiusumi tassaapput isertitaqarnerussutit. Akerlianilli aningaasanut inatsisissamut tunngatillugu isumaqatigiinniarnit maanna ingerlasut 58 mio. kr.-inik aningaasartuuteqarnerunermik aammalu peqqinnissamut suliaasaqarfiup iliuuseqarfigineqarneranik kiisalu KANUANA-mut nakkutilliisut angallatissaannut nutaamut 63 mio. kr.-inik aningaasartuuteqarnerunermik nassataqassasut naatsorsuutigineqarpoq.

Ukiut sisamat ingerlaneranni 139,9 mio. kr.-inik amigartooruteqarnissamik missingersuuteqarnek peerneqarsinnaaqqullugu ukiumut agguaqatigiissillugu 35 mio. kr.-it sipaarutissatut pissarsiarineqarnissaat inernilunneqartariaqarpoq.

2.1 Aningaasaqarnermut Ataatsimiititaliap ataatsimut isigalugu isummenera

Naalakkersuisut aappassaaneerinninnissamut allannguutissatut siunnersuutaasa amerlanerpaartaasa akuersisutigineqarnissaat Aningaasaqarnermut Ataatsimiititaliamit inassutigineqarpoq. Siunnersuutip pingajussaaneerneqarnissaanut allannguutissatut siunnersuutininik allanik saqqummiussinissaq Naalakkersuisut naatsorsuutigaat. Naalakkersuisulli aappassaaneerinninnissamut allannguutissatut siunnersuutaasa ilaannut isummerfiginninnissani ataatsimiititaliap kinguartittariaqarsimavaa.

Naalakkersuisut aappassaaneerinninnissamut allannguutissatut siunnersuutaasa nassataannik piffissamut aningaasanut inatsiseqarfiusumut tamarmut IS-imi katillugit 165 mio. kr.-inik ami-

gartoorteqarnissap Naalakkersuisunit naatsorsuutigineqarnera eqqarsaatigalugu pingajussaa-neerinninnissaq sioqqullugu suliassaqaaluttoq ataatsimiititaliamit takuneqarsinnaavoq. Tamatumunnga taperseeqataanissani ataatsimiititaliap qilanaaraa, takusinnaalluguli siunnersuutip pingajussaaerneqarnissaanut Naalakkersuisut allannguutissatut siunnersuutaasa misissornissaanut naammattumik piffissaqarnissaq ajornakusoorsinnaasoq.

Ajornartorsiut tamanna immikkut eqqumaffigniaqqullugu Naalakkersuisut ataatsimiititaliamit kaammattorneqarput.

3. Aningaasaqarnermut Ataatsimiititaliap apeqqutai/oqaaseqaatai aalajangersimasut – suliassaqarfinnut agguataarlugit

Isumaliutissiissummi ilanngussat K aamma L ataatsimiititaliap Naalakkersuisunut aallarniutigalugu apeqqutaanik Naalakkersuisullu akissutaannik imaqartut, aallarniutigalugit innersuusutigineqassapput.

Aallarniutitut Naalakkersuisunut apeqqutini Naalakkersuisullu akissutaat Aningaasaqarnermut Ataatsimiititaliap Inatsisartut ataatsimiititaliaannut ilisimatitsissutigai.

4. Aningaasaliissutitut allannguutissatut siunnersuutit

Immikkoortoq 1-imi taaneqartutut aningaasanut inatsisissatut siunnersuummut allannguutissatut siunnersuutit 62-inik Naalakkersuisut saqqummiussipput. Taakkunannga 54-it aningaasaliissutitut allannguutissatut siunnersuutaapput 8-llu oqaasertaliussanut allannguutissatut siunnersuutaallutik. Oqaasertaliussanut allannguutissatut siunnersuutit isumaliutissiissutip immikkoortuini 4-mi 5-imilu sammineqarput.

Aningaasaliissutitut allannguutissatut siunnersuutit sammisanut ukununnga immikkoortinneqarsimapput:

- Sammisag 1: Teknikikkut allannguutit
- Sammisag 2: Missingersuutitut sunniuteqanngitsumik allannguinerit
- Sammisag 3: Oqartussaaffimmik allannguineq
- Sammisag 4: Aningaasartuutaanerusut
- Sammisag 5: Aningaasartuutaannginnerusut
- Sammisag 6: Isertitassatut missingikkat nutaat aammalu aningaasartuutitut inatsisitigut pisussaaffigisanut missingikkat nutaat
- Sammisag 7: Suleriaatsimut Ataatsimiititaliaq

Aningaasaliissutitut allannguutissatut siunnersuutit nr. 1-imit nr. 54-imit *normulersugaapput*.

Aningaasaliissutit pineqartillugit allannguutissatut siunnersuutit ataasiakkaat normui *aningaasaliissutitut takussutissiami* allasimapput; *ilanngussaq 1*. Aningaasaliissutitut takussutissiat Naalakkersuisut aningaasaliissutitut allannguutissatut siunnersuutaannut saarlinnqorlugit ilanngunneqarput, taakkulu isumaliutissiissummut ilanngussaq I-tut ilanngunneqarlutik.

Oqaasertaliussanut allannguutissatut siunnersuutit 8-aapput. Taakku nr. 55-imit nr. 62-imit *normulersugaapput*. Oqaasertaliussanut tunngatillugu normuliuuneqartoq oqaasertaliussat siornagut allanneqarpoq. Oqaasertaliussat *ilanngussaq 2*-mik taaguuserneqarput. Taakku isumaliutissiisummut ilanngussaq J-ip ataani ilanngunneqarput.

4.1. Sammisag 1 – Teknikikkut allannguutit

Qulequttami tassani allannguutissatut siunnersuutit 25-inik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiumilu missingersuusiorfiusuni ataatsimut isigalugu IST-mut sunniuteqassanngillat.

Sammisag missingersuutit ilanngussat oqaasertaasa suliassanullu takussutissiat il.il. nutarternerannut tunngassuteqarpoq. Sammisami allannguutissatut siunnersuutit aningaasaliissutit allannguisunik saqqummiisoqanngilaq.

Sammisag 1-ip ataani allannguutissatut siunnersuutit nr. 1-25 **akuerineqassasut** ataatsimiititaliamit **inassutigineqarpoq**.

4.2. Sammisag 2 – Missingersuutit sunniuteqanngitsumik allannguutit

Qulequttami tassani allannguutissatut siunnersuutit 17-inik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiumilu missingersuusiorfiusuni ataatsimut isigalugu IST-mut sunniuteqassanngillat.

Sammisag 2: Missingersuutit sunniuteqanngitsumik allannguinermi suliassaqrarfiit arlalinnut missingersuutitigut sunniuteqanngitsumik allannguisoqarnissaa qinnutigineqarpoq. Tassani ilaatigut kontu pingaarnermi, 20.11.51 Aaqqissuusseqqinnerit sunniutaat, suliffeqarnermut ilanngaatiq aningaasalersornissaanut aningaasat atugassanngortinneqarnissaat ilaapput. Taamaaliortoqassappat ilaatigut kontu pingaarnermi, 24.06.14 Suliffeqarnermi ilanngaatiq, aningaasaliissutit inatsisitigut pisussaaffiulersuni 79,4 mio. kr.-nik immikkoortitsisoqartalissaaq. Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. 41, 2. december 2019-imeersoq naapertorlugu aningaasat 2021-mi ukioq aningaasarsiorfiusoq 2020 tunuliaqutaralugu tunniunneqassapput. Taakkua saniatigut kontu pingaarnermi, 20.11.70 Suliniutinut nutaanut sillimmatit, suliniummit 'SDG-mut sillimmatit' 2021-mit 2023-mut ukiumut 0,5 mio. kr.-t atugassanngortinniarneqarput. Aningaasat kontu pingaarnermut, 20.16.01 Naatsorsueqqissaartarfik, nuunniarneqarput, matumani aningaasaliissutit Naatsorsueqqissaartarfiup nittartagaani nunarsuarmi anguniakkanut uuttuutinut takussutissamik ineriartortitsinissamut, attassinissamut pilersitsinissamullu atorneqarnissaat naatsorsuutigineqarpoq. Takussutissaq nunarsuarmi nunamilu uuttuutit piusunut, Naatsorsueqqissaarfimmit uuttorneqartunut imaluunniit Naatsorsueqqissaartarfiup kisitsisitigut paasissutissaatigut ingerlateqqinneqartunut allattorsimaffittut ajornanngitsumik pissarsiarineqarsinnaassaaq. 0,5 mio. kr.-nik

taakkunanga atugassanngortitsisoqarpat AI2021-mi kontu pingaarnermi, 20.11.70 Suliniutinut nutaanut sillimmatit, 2021-mit 2023-mut SDG-mut sillimmatit ukiumut 1,0 mio. kr.-ussapput.

Allannguutissatut siunnersuutinut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Allannguutissatut siunnersuutinut nr. 27-mut aamma 33-mut isummernissani aningaasanut inatsisissatut siunnersuutip pingajussaaneerreqarnissaanut ataatsimiititaliap **kinguartippaa**.

Sammissaq 2-p ataani allannguutissatut siunnersuutit nr. 26-mut, 28-mit 32-mut kiisalu 34-mit 42-mut akuerineqassasut ataatsimiititaliamit **inassutigineqarpoq**.

4.3. Sammissaq 3 – Oqartussaaffimmik allanngueq

Qulequttami tassani allannguutissatut siunnersuummik 5-inik Naalakkersuisut saqqummiussipput. Allannguutissatut siunnersuutit taakku ukiumi aningaasanut inatsiseqarfiusumi ukiumilu missingersuusiorfiusuni ataatsimut isigalugu IST-mut sunniuteqassanngillat.

Sammissami matumani illuliortiternernut aningaasalersuinerup aquneqarnerata ASA-mit Ineqarnermut Attaveqaqatigiinnermullu Naalakkersuisoqarfimmut ataatsimoortilernissaa naleqqunerusetut nalilerneqarmat allannguutissatut siunnersuutit arlallit saqqummiunneqarput. Kontu pingaarnep, 20.10.25 Ineqarnermut taarsigassarsiat akilerneqarneri, kontu pingaarnep nutaamut, 72.06.08 Illuliortiternernut aningaasalersuineq, nuunneqartussap aquneqarnera matumani ilaatigut pineqarpoq. Oqartussaaffimmik naalakkersuinikkut allanngueq matumani pineqanngilaq, suliasamulli akisussaaffiup, piviusumik Ineqarnermut Attaveqaqatigiinnermullu Naalakkersuisoqarfimmit isumagineqareersup erseqqissarneqarnera pineqarpoq.

Sammissaq 3-p ataani allannguutissatut siunnersuutit nr. 43-47 **akuerineqassasut** ataatsimiititaliamit **inassutigineqarpoq**.

4.4. Sammissaq 4 – Aningaasartuutaanerusut

Qulequttami tassani allannguutissatut siunnersuutinik 3-nik Naalakkersuisut saqqummiussipput. Allannguutissatut siunnersuutit taakku IST-p inerneranut aningaasanut inatsiseqarfimmi 2021-imi 1,93 mio. kr.-inik aammalu ukiumi missingersuusiorfiusuni 2022-2024-mi ukiumut 0,9 mio. kr.-inik ajorseriaataassapput.

Sammissami allannguutissatut siunnersuutit pingasut, missingersuutinik ikinnerusunik ajornerulersitsisut saqqummiunneqarput. Tamatuma kingunerisaanik kalerrisaarineri ataatsimut sianerfissaq 1-1-2-mut ukiumut aningaasartuutit AIS2021-mi naatsorsuutigisatut 1.000.000 kr.-unatik 1.580.000 kr.-usussaasutut nalilerneqarmata kontu pingaarnermut, 20.11.70 Suliniutinut nutaanut sillimmatit, aningaasaliissutit ukiumut 580.000 kr.-nik ilaniarneqarput. Tamatuma

saniatigut NemKontop ingerlannissaata aningaasalersornissaanut kontu pingaarnermut 40.98.01 Digitalinngorsaanermut Aqutsisoqarfik, aningaasaliissutit 350.000 kr.-nik ilaniarneqarput. Kingullertut kontu pingaarneq, 50.06.25 Aalisarneq pillugu Ataatsimiititaliarsuaq, matumani ataatsimiititaliarsuup coronavirusip takkunera pissutigalugu sulinerata kinguaattoorsimanera tunuliaqutaralugu 1,0 mio. kr.-nik aningaasaliissuteqarfialugu AI2021-mut ilanngunniarneqarpoq, taamaattumik Aalisarneq pillugu Ataatsimiititaliarsuup isumaliutissiissutini 2021-p affaata siulliani Naalackersuisunut tunniutissallugu naatsorsuutigaa. AIS2021-mi siunertamut aningaasanik immikkoortitsisoqarsimanngilaq.

Allannguutissatut siunnersuutitut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Sammissaq 4-p ataani allannguutissatut siunnersuutit nr. 48-50 **akuerineqassasut** ataatsimiititaliamit **inassutigineqarpoq**.

4.5. Sammissaq 5 – Aningaasartuutaannginnerusut

Qulequttami tassani allannguutissatut siunnersuutit 2-nik Naalackersuisut saqqummiussipput. Allannguutissatut siunnersuutit taakku IST-p inerneranut aningaasanut inatsiseqarfimmi 2021-imi 1,752 mio. kr.-inik aammalu ukiuni missingersuusiorfiusuni 2022-2024-mi ukiumut 0,3 mio. kr.-inik pitsanngoriaataassapput.

Sammissami allannguutissatut siunnersuutit marluk, missingersuutit ikinnerusunik ajornerulersitsisut saqqummiunneqarput. Kontu pingaarnermut, 40.10.06 nunatsinni efterskolit ingerlanneqarnerinut tapiissutit, aningaasaliissutit 1 %-imik ikilinerannik kinguneqartussamik ukiumut 252.000 kr.-nik ilanngarneqarnissaat matumani pineqarpoq. Ukiut tulluittuni efterskolimi atuartut ikilinnissaannik naatsorsuuteqarneq tunngavigalugu ilanngaaniartoqarpoq. Kontu pingaarnermut, 67.01.09 Aatsitassanut Isumalioqatigiissitaq, aningaasaliissutit 2021-mi 1,5 mio. kr.-nik ilaniarneqarput, matuma kingorna kontu pingaarneq AI2021-mi peerneqassalluni. 2020-mi aningaasaliissutit, IA-suliap nr. 20-889 naapertorlugu assinganik 1,5 mio. kr.-nik ilanngarneqarnikuupput, ingerlatsinermut tapiissutitullu aningaasaliissutit arlallit coronavirusi pissutigalugu ilanngarneqarsimallutik. Taamaattumik tamanna tunuliaqutaralugu kontu pingaarnermut aningaasaliissutit AIS2021-mut ilanngunneqarnerat kukkuneruvoq.

Sammissaq 5-ip ataani allannguutissatut siunnersuutit nr. 51-52 **akuerineqassasut** ataatsimiititaliamit **inassutigineqarpoq**.

4.6. Sammissaq 6 – Isertitassatut missingikkat nutaat aammalu aningaasartuutitut inatsisitigut pisussaaffigisanut missingikkat nutaat

Qulequttami tassani allannguutissatut siunnersuummik ataatsimik Naalackersuisut saqqummiussipput. Allannguutissatut siunnersuut taanna IST-p inerneranut aningaasanut

inatsiseqarfimmi 2021-imi 3 mio. kr.-inik aammalu 2022-mi kiisalu 2024-mi 5 mio. kr.-inik pitsanngoriaataassaaq aammalu aningaasanut inatsiseqarfimmi 2023-mi missingersuutitut sunniuteqassanani.

Kontu pingaarnermut, 72.06.08 Illuliortiternernut aningaasalersuineq, allannguutissatut siunnersuut saqqummiunneqarpoq. Allannguutissatut siunnersuutip IST-mi inerneq katillugit 13 mio. kr.-nik, 2021-mit 2024-mut aningaasanut inatsiseqarfiusumut tunngatillugu pitsaanerulersippaa.

Sammissaq 6-ip ataani allannguutissatut siunnersuut nr. 53 **akuerineqassasoq** ataatsimiititaliamit **inassutigineqarpoq**.

4.7. Sammissaq 7 – Suleriaatsimut Ataatsimiititaliaq

Sammissami Inatsisartuni Suleriaatsimut ataatsimiititaliaq allannguutissatut siunnersuummik ataatsimik saqqummiivoq. Allannguutissatut siunnersuut taanna IST-p inerneranut piffissami aningaasanut inatsiseqarfimmi 2021-2024-mi ukiumut 260.000 kr.-inik ajorseriaataassaaq.

Sammissami Inatsisartuni Suleriaatsimut ataatsimiititaliaq allannguutissatut siunnersuummik saqqummiivoq, matumani kontu pingaarnermut 01.11.01 Inatsisartut Ombudsmandiat, aningaasaliissutit ukiumut 260.000 kr.-nik ilaniarneqarlutik. Taamaattumik Naalakkersuisut tamanna allannguutissatut siunnersuutiginnilaat, taamaattorli ilanngunneqarpoq AIS2021-p aappassaa-neerneqarnissaanut allannguutissatut siunnersuutit aningaasaqarnikkut kingunissaasa tamarmiusut nassuiarneqarnissaat pillugu.

Sammissaq 7-ip ataani allannguutissatut siunnersuut nr. 54 **akuerineqassasoq** ataatsimiititaliamit **inassutigineqarpoq**.

5. Oqaasertaliussanut allannguutissatut siunnersuutit

5.1 Naalakkersuisut oqaasertaliussanut allannguutissatut siunnersuutaat

Oqaasertaliussanut allannguutissatut siunnersuutit katillugit 8-nik Naalakkersuisut siunnersuuteqarput.

Matumani kontu pingaarnermut, 40.95.01 Eqqumiitsuliornermut kulturimullu tapiissutit allat, oqaasertaliussat pingaarnertut taaneqarsinnaapput, taakkuami kontu pingaarnermut eqqumiitsuliornermut aningaasaateqarfimmut, Naalakkersuisut Eqqumiitsuliornermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. 25, 28. november 2019-imeersoq naapertorlugu pilersinnissaanut piginnaatitaaffigisaannut aningaasanik nuussinissamut piginnaatitsipput. Kontu pingaarnermi, 72.02.03 Inissialiortiternernut aqutsinermut pilersarusiornermullu aningaasartuutit, oqaasertaliussat kommuninit, kommunini inissiaatileqatigiiffinnit, kommunini allaffissornermik ingerlatseqatigiiffinnit, Illuut A/S-imit aamma INI

A/S-imit paasissutissat attuumassutilinnik, paasissutissanik katersivimmik tassungalu nittartakkakut isaaffimmik nalunaarsuutinillu pilersitsinissamut ingerlannissaannullu atugassanik aamma pisortat inissiaataat attartortittakkat pitsaassusiisa ataatsimut ingerlaavartumillu nutarterneqartumik allaatiginerannut iluaqutaasussanik piniarnissamut piginnaatitsisut ilannguniarneqarput. Pisortat inissiaataasa attartortittakkat nutarternerannik aserfallatsaaliomerannillu suliassat naammassineqarnissaannut, matumani ingerlatsinerup aserfallatsaaliomerisa akornanni oqimaatigiitsitsinissamut tunngavissanik patajaatsunik pilersitsinissamut atugassaapput. Oqaasertaliussat Aningaasaqarnermut Akileraartarnermullu Ataatsimiititaliamit 2020-mi siornatigut akuerineqarnikuupput, IA-suliap nr. 20-896 takuuk. Taakkua saniatigut kontu pingaarnermut, 34.01.04 Peqqinnissaq pillugu isumalioqatigiissitaq, oqaasertaliussat kontu pingaarnermi atuinikinnerussutinik ukioq aningaasanut inatsiseqarfiusumut tullermut nuussinissamik periarfissiisut ilanngunniarneqarpoq. Oqaasertaliussat peqqinnissaq pillugu isumalioqatigiissitap coronavirusimik pisup kingunerisaanik 2020-mi pilersinnissaata kinguaattoornera tunuliaqutaralugu pilersinneqarput. Tamanna tunngavigalugu ilassutitut aningaasaliissutit nassiunneqarnissaat naatsorsuutigineqarpoq tassungalu oqaasertaliussat 2020-mi kontu pingaarnermut ilanngunniarneqarlutik.

Allannguutissatut siunnersuutinut ataasiakkaanut Aningaasaqarnermut Ataatsimiititaliaq ilassutitut oqaaseqaatissaqanngilaq.

Oqaasertaliussanut allannguutissatut siunnersuutit nr. 55-imit 62-imut **akuerineqassasut** ataatsimiititaliamit **inassutigineqarpoq**.

6. Aningaasaqarnermut Ataatsimiititaliap inassuteqaatai

Taama oqaaseqarluni Aningaasaqarnermut Ataatsimiititaliap aningaasanut inatsisissatut siunnersuut Inatsisartunit aappassaaniigassanngortippaa.

Sammissaq 1-ip ataani allannguutissatut siunnersuutit nr. 1-24 **akuerineqassasut** ataatsimiititaliamit **inassutigineqarpoq**.

Allannguutissatut siunnersuutit nr. 27-mut aamma 33-mut isummernissani aningaasanut inatsisissatut siunnersuutit pingajussaaneerqarnissaanut ataatsimiititaliap **kinguartippaa**.

Sammissaq 2-p ataani allannguutissatut siunnersuutit nr. 26-mut, 28-mit 32-mut kiisalu 34-mit 42-mut akuerineqassasut ataatsimiititaliamit **inassutigineqarpoq**.

Sammissaq 3-p ataani allannguutissatut siunnersuutit nr. 43-47 **akuerineqassasut** ataatsimiititaliamit **inassutigineqarpoq**.

Sammissaq 4-p ataani allannguutissatut siunnersuutit nr. 48-50 **akuerineqassasut** ataatsimiititaliamit **inassutigineqarpoq**.

Sammissaq 5-ip ataani allannguutissatut siunnersuutit nr. 51-52 **akuerineqassasut** ataatsimiititaliamit **inassutigineqarpoq**.

Sammissaq 6-ip ataani allannguutissatut siunnersuut nr. 53 **akuerineqassasoq** ataatsimiititaliamit **inassutigineqarpoq**.


Sammissaq 7-ip ataani allannguutissatut siunnersuut nr. 54 **akuerineqassasoq** ataatsimiititaliamit **inassutigineqarpoq**.

Oqaasertaliussanut allannguutissatut siunnersuutit nr. 55-imit 64-imut **akuerineqassasut** ataatsimiititaliamit **inassutigineqarpoq**.

Inatsisartut suliarinninnerat tunngavigalugu Inatsisartut inaarutaasumik pingajussaaneerinnillutik suliarinninnissaat sioqqullugu Aningaasaqarnermut Akileraartarnermullu Ataatsimiititaliamut suliarineqaqqittussanngorlugu inatsisissatut siunnersuut ingerlateqqinneqassasoq ataatsimiititaliamit **inassutigineqarpoq.**




Hermann Berthelsen



Múte Bourup Egede




Malene V. Rasmussen



Mala Høy Kúko



Peter Olsen



Aleqa Hammond



Jens Napaattooq